

續金華叢書



竹金華叢書



少室山房類藁卷十一

續金華叢書

澱水胡應麟明瑞著

五言古詩五十四首

擬古十九首

有序

不佞垂髫談藝卽耽耆東西二京憶操翰之初賦詩送人之
白下起句云悲風號枯桑吹墮林上月客子將遠行驅車中
夜發一時名流驟加賞嘆以歷塊期之弱冠從家大人入長
安社中酬倡大都五七言律亡暇古風比歲巖居始克以佔
俾餘工稍稍從事嘗擬作古十九首東裝北上染指輒休乍
過婁江請益王長公長公拳拳進余努力茲道適長夏閉關
因檢拾舊草點綴聯絡竟成此章并士衡所擬蘭若生春陽
爲二十首古詩絕唱世以爲白雪陽春不當擬議迺昔人每
云取法乎上僅得其中則自三百篇而下當法孰先國朝仲
默于鱗咸有斯作兩家得失集中具見余之擬此聊爲異時

印証之自若曰優孟抵掌非余所能知矣

嚴霜結重陰歲序忽已暮
念子當遠遊抗手卽行路
路行常苦遠客歸嘗苦晚
浮雲蔽關塞白日不可挽
昔爲婚與姻今爲胡與秦
落葉隨飄風飛鴻辭故羣
君心豈難保妾願匪長好
登高望平原四顧盡衰草
相思無朝夕沈憂令人老
願爲雙車輪隨君萬里道

其二

鬱鬱城東門盈盈桃與李
抽條仲春月穠艷若羅綺
軒車競采掇日暮未言止
如何秋風生搖落自茲始
寄語青樓倡盛顏難久恃

其三

清晨策駑馬整轡南山隅
遙望長安城飛觀百尺餘
峩峩青雲端甲第羅長衢
華鏤若流水軒蓋何威紆
各騁要路津盈盈道中趨
人生若飛藿奄忽隨丘墟
盛衰各有極貴賤同斯須
何如命我友斗酒鳴笙竽
逍遙放情志卒歲聊自娛

其四

令節懷嘉賓親友四面會軒車若雲屯高談盡冠蓋旨酒羅長筵新
聲動環珮秦箏響未畢楚袖盈庭內同心競酬酢羽觴互更代各言
行樂殊少壯不相待勞生狗榮華日月忽已邁千秋萬世盡賢聖亦
焉在

其五

綺樓亘中天窈窕百餘尺飛甍架複道藻井縱橫出上有雙蛾眉容
華世無匹臨風發皓齒當戶理瑤瑟新聲入雲漢四座咸動色行人
競傾聽日暮不遑息但覩來者懽誰明居者臆盛年處空閨中夜起
悽惻

其六

采采叢蘭花美人隔江沚褰裳涉其波舟楫誰爲理迴風動羅裳日
暮聊徙倚安得雙鴛鴦銜致篋中綺

其七

客遊異鄉縣終歲懷苦辛憂思起長夜展轉不得晨舉頭望河漢悵

彼參與辰疇昔同盟友金石偕交親飛飛振六翮棄我若途人我欲
東歸洛日暮河無津徘徊入房中涕淚沾衣巾

其八

彼美東隣子習禮明書詩十五登君堂新婚諧結褵願爲雙飛鴻百
歲不相離風波起中路忽去天一涯不惜去日遠但恐懽愛移黃塵
蔽關塞會合無前期願君策高足努力趨明時生當聚華堂死當長
別離

其九

灼灼芳樹枝敷榮一何早綠條被繁英初日何杲杲感此芳春時采
掇寄遠道馨香不終夕零落隨百草盛年處空閨顏色爲誰好

其十

嚴霜瘁百草節序忽復易噉噉雙飛雁雲中各自適念我同衾人索
處異南北披衣望天宇眾星何歷歷牽牛隔河梁織女限東壁徬徨
間一水欲往步難卽同心復異地何異不相識

其十一

清晨出大梁遙瞻北邙道野火燒平田白楊半枯槁人生寄宇宙忽若原上草去日常苦多來日常苦少者日以壯壯者日趨老幻軀無百年富貴何足保思爲魯中聖萬世同壽考

其十二

高城跨東南大道夷且直青樓間綺疏瞳瞳照初日五陵俠少年結束事遊暱白馬飾銀鞍連翩度阡陌美人遙目成相對理瑤瑟十千輕一笑百萬當一擲爲樂願及晨爲懽願及夕紅顏匪百歲何由保金石

其十三

迴車壩原上白日忽將暮石門高崔嵬悲風起長路借問何人阡無乃前朝墓人生寄一世奄忽迅朝露荒哉秦漢主尋仙起遐慕弱水不可援三山竟焉度玉碗出人間徒爲赤松誤傷彼泉下人喟焉策蹇步吹竽宴華堂娛樂從所務飄飄極心志千載爲旦暮

其十四

驅車越長道還歸故里間
少小客咸陽今來廿載餘
親知半凋落塚墓留村墟
松柏儼成行狐兔交路衢
門巷寂無人誰爲問鄰居
停車再嘆息日暮長欷吁
客行盡九州不如守敝廬

其十五

浮生若飛蓬寄迹宇宙間
萬物皆有盡胡爲長苦顏
旨酒列高臺嘉賓共盤桓
夜闌當秉燭日宴當沈酣
人生無百年譬彼東逝川
生者不慙歎死者寧復還

其十六

昭昭三五夕皎月流素光
徘徊入高樓照我羅衣裳
攬衣坐嘆息起步仍徬徨
良人懷遠遊九載客他鄉
空閨知歲暮獨處知夜長
嗷嗷雲中雁隨風忽南翔
安能假羽翼萬里來君傍

其十七

凜凜北風至霜雪零前除
惜哉征人婦歲宴恆寡娛
夙昔奉衾裯矢

志誓不渝如何棄我去悠悠長路隔思君隔天未邈如秦與越歡愛
寧復論鉛華爲君絕君懷如明月妾心如永雪君懷有圓缺妾心徒
皎潔

其十八

清晨啟重關有客千里至手攜尺一書言我故人寄長跪問故人客
亦無所言開緘讀素書宛若覩所歡上有金錯刀下有白玉環明月
三五滿故人會當返

其十九

仲秋涼氣肅嘒嘒雁南度北斗倚闌干氣運淒以暮悲來撫長劒浩
歌起庭戶一爲遠方客永別親與故頻夜夢室家展轉忽已寤念欲
還故鄉按轡遵廣路悠悠大河水一葦安可渡

其二十

亭亭孤桐樹託根嶧山岑良工琢其枝爲我匣中琴膠漆相交結珍
重逾南金被以朱絲絃彈以白雪吟清音順風揚四坐疇同心佳人

隔天末日暮涕沾襟王長公云十九首最難言離之則虞落節前輩俱所不免合之則虞捧心于麟亦微用爲累足下加之矣唯在更刻鋒巧露其質木而已

又擬古八首

冉冉歲云暮念君遠別離浮雲蔽原野四顧白日馳夙昔幸同衾懽愛誓不移如何百年好去我忽若遺巖風起天未霜雪盈路歧晨起踐關山薄暮長抱饑音徽日夜隔會合當何時恨無晨風翼並起東南飛

其二

高樓有思婦被服姣且妍橫琴理清曲淥水被幽蘭一彈浮雲暮再鼓流風旋哀音振林木聽者爲忘餐借問何人婦感嘆停朱絃征夫越萬里一別歲載遷鉛華坐銷歇太息空嬋娟

其三

灼灼園中花盈盈道傍柳敷榮艷陽月攀折佳人手秋風一朝至容耀詎能久人生寄天地聚散何不有俛仰百歲間倏忽成老醜身名

匪金石富貴欲誰守怡我平生親獨有盈尊酒

其四

蕭蕭金風至大火時西流遊子異鄉縣中夜懷百憂驅車駕言邁奄忽歲已秋登高望故里江漢何悠悠佳人在遠道欲濟無輕舟同心日夜隔涕淚縱橫流願爲南飛翼萬里行相求

其五

朝登北邙山徘徊望陵谷荒墳何纍纍狐兔自相觸白楊夾脩途黃泉蔽層曲傷彼潛寐人年命一何速生存宇宙間行樂苦不足驅車暮歸來鳴箏燕華屋北里揚清音南鄰薦新曲親知從我游被御紈與穀相對各盡觴良夜更秉燭榮名耀百代轉盼同初旭亮無喬松壽誰能傷局促

其六

青鳥從南來翩翩隨風翔口銜尺書至乃自大海傍美人三歲別沈憂熱中腸織成機中錦拂拭爛生光下爲連理枝上爲雙鳳凰致之

萬里道聊以充君牀願言勗斯義旦夕毋相忘

其七

迴風吹轉蓬倏忽行萬里遊子懷山川驅車暮不止荒郊四無人日
入斷行旅熊羆向我啼僮僕爲我侶南望見故鄉失路空徙倚眷彼
平生親氣結不能語

其八

東隣有美質雜珮何繽紛明眸輝朝日絕代少其倫結褵爲君婦婉
孌日偕親風波起閨闈中道成荆榛君爲東流水妾若西路塵東西
各相背信誓何由聞紅顏會當歇豈不懷苦辛願君企高節賤妾寧
復云

古離別二首

戚戚遠行子駕言還舊疆脂車望關塞願逐晨風翔主人卜清夜置
酒臨高堂妙伎出閨闈纖腰移曲房當筵發皓齒四坐流芬芳迴飈
襲綺戶飛霜飄長廊良宵一何促瑤瑟無輝光征夫念明發握手起

徬徨仰視雲中雁三五各成行胡爲雙飛龍羽翼多參商丈夫志萬里會晤安可常勗哉就長路皓首期相望

其二

驅車出郭門徘徊望都邑念我平生親聚散何倉卒白露塗中達清霜被原隰驚飈動地起黃葉無寧夕羈禽懷故林疲馬倦行役羣雁西南翔哀音正嘹唳豈無盈尊酒執手歧路側飛觴屬華筵行子相向立別離在須臾沈憂萬端集去去勿復論紅顏中道擲

雜詩四首

明河沒天宇白露晨爲霜睠彼同心人忽去天一方倉皇挈尊酒送子河之梁登高望四野川陸浩縱橫豈無瑤華音道遠不得將攬衣入房戶馳念忽如傷

其二

曜靈薄崦嵫光景忽已夕圓魄猶未升明星爛然出寒蛩號我前蟋蟀鳴我側涼風起庭戶樹木何蕭瑟佳人期不來延竚空歎息寧知

三歲心爲子長惻惻

其三

冉冉西馳日悠悠東逝川征夫怨長路志士惜盛年長路行當歸盛
年不再還寒暑互推移陰陽浩無端淒風起簾幙白露中夜溽美人
坐高堂投袂起長嘆

其四

窮陰亘晦朔山谷多寒風悲哉客遊子旋足如轉蓬昔行屆長夏今
來值玄冬悠悠十年內車轍窮寰中人生貴適意遙役何憧憧逝將
歌考槃岩穴安微躬

寓懷十二首

端居意不適策杖起行遊仙人八公侶攜我昇蓬丘泠泠隨風舉衣
袂若雲浮放歌崑崙頂下視弱水流天都信寥廓絳節聊淹留黃金
被高館白玉開層樓樂哉瑤池上一飲爲千秋

其二

崇蘭處深谷綠葉凌朝陽迴風一披拂百里傳芬芳惜哉藂林下無人知國香燐燐桃李樹託根歧路傍飛花落闥闥弄影臨華堂詎以盛衰故易此貞素常不見西山老食薇終首陽

其三

飄飄穆天子八駿乘風馳日行三萬里遠道何不之西遊見王母宴飲登蓬池千秋蟠桃實萬仞扶桑枝寄言謝塵世百代同須斯

其四

夷羿射九日共工觸不周龍伯連巨鰲伯鯨湮洪流貪嗔起一念乃與造化仇力窮固難繼身滅將誰尤巍巍軒轅帝問道崆峒丘唐虞守無爲四靈畢來遊

其五

亭亭孤松樹託根徂徠顛高枝翳白日曲榦臨迴川女蘿蔚蒙籠風雷炭相纏豈無明堂用物性貴自然一爲匠石顧斤斧成災患何如鄧林下寂寞全天年

其六

壺丘與天遊列禦乘風行飄飄漆園吏九萬凌高冥胡爲末世士多
歧日屏營蹢躅死財利夷齊狗空名寧知大道觀不異蝸與螟華胥
有逸民去去行相親

其七

弱齡負奇尙雅志誦墳史訪岳懷尙生浮湘慕遷史杖策遊中原邂
逅二三子裘馬何翩翩招要共生死經過漸離輩感激昭王士黃金
空崔嵬所願非尺組長揖辭諸侯歸耕汶陽涘

其八

彼美傾城子艷色明朝霞寶釵耀金雀充耳珮瓊珈相如旣西席宋
玉仍東家春風起羅袂琴瑟相交加但知良時樂安覩白璧瑕託身
一失所百歲徒咨嗟

其九

昔有夸娥子猛氣雄千兵褰裳逞逸足思欲追曜靈逡巡陽谷傍道

渴不任行投身死岩穴骨肉盈林垆過澆簋夏室莽卓乘炎精人謀
豈不殫天命俄已傾寄言雄圖者割據徒營營

其十

日余負竒好夙尙在髫齡禮樂觀百王詩書窮六經言乘休明會將
致海宇平如何歲年邁依依卧柴荆亮乖四方志永希千載名文章
亦大業富貴寧重輕勉哉事著述三代追遺英

其十一

丹霞蔽岩谷素雪霏林臯悠悠避世士歲晏守蓬蒿箕山旣紆鬱首
陽何岩堯時偕沮溺侶耦耕向南郊大厦匪安居千駟爲禍招悲哉
路傍子磬折方勞勞

其十二

有鳥從東來遊戲青雲中朝翔閬風館夕息瑤池宮言欲覽德輝來
下雙梧桐搖搖荆棘枝鳴臯宅其聚所嗜惟腐鼠焉知彼所從竦身
奮六合將返崑崙東